

I. N. J.

EÜCHARISTICA ORATIO,

Juxta illud Numer. XXI. v. 18.

Disz ist der Bruñ/ den die Fürsten gegra-
ben haben/ die Edlen im Volck haben ihn gegra-
ben/ durch den Lehrer und ihre Stäbe.

In memoriam devotam

Munificentiae & Liberalitatis maximae

Serenissimi Principis ac Domini

DN. JOHANNIS
GEORGI II.

Elect. Saxon. Burggravii Magdeb. &c. &c.

Domini nostri Clementissimi,

Aliorumq;

Cum

REVERENDISSIMORUM & ILLUSTRISSIMORUM

PRINCIPUM,

Tum

Præ-Nobilium & Honoratissimorum Virorum,
Vestigia Magni nostri OCTOVIRI sponte legentium,

Circa Restaurationem SCHOLÆ TORGENSIS

Et Auditorii Novi, jam jam occupandi, pro auspi-
candis Lectionibus

d. XXV. Septembr.

Quo ante CXXI. annos,

Novum Religioni Orthodoxæ robur accessit pace Passaviensi
firmiter stabilita,
publicè habita

a

M. Jacobo Reichmanno, Rectore.

TORGÆ,

Typis JOHANNIS ZACHARIÆ HEMPEL,
Sereniss. Elect. Saxon. Typogr. Aul.

BIBLIOTHECA
PONICKAVLANA





*Serenissimo & Potentissimo Principi
ac DOMINO,*

**DN. JOHANNI
GEORGIO II.**

**Duci Saxoniae, Juliae, Clivae ac Montium
Sacri Rom. Imperii Archimarschallo & Electori, Landgravio Thuringiae,
Marchioni Misniae, nec non Utriusq; Lusatiae, Burggravio Magde-
burgensi, Comiti de Marca & Ravensberg,
Dynastae in Ravenstein, &c. &c.**

Domino Meo Clementissimo

**Hoc Gratitude Monumentum
Strenae loco**

sacrum esse volui

**Offerredq; debui humillima manu
& mente devota.**

M. JACOB REICHMAN. R.

(TIT.)

IN nomine Sacrosanctæ TRINITATIS, DEI Patris, DEI Filii, & Sancti Spiritus, hoc in Acroaterio tam splendide ornato, Lectiones ordinarias auspicaturis nefas omnino & piaculi instar visum est, singularia illa collata in Scholam hanc beneficia, & merita longè maxima ita præterire, ut nec DEO immortalis, Auctori ac largitori omnis boni, pro ineffabilibus muneribus, immortales laudes gratesque persolverentur; nec ulla fieret, vel Serenissimi ELECTORIS SAXONUM, Dn. nostri clementissimi, vel Reverendiss. Principum ac Dominorum, FRATRUM, cum insigni laude, mentio, quorum omnium & singulorum, magno perè prædicanda liberalitas est ac pietas, providentiaq; plusquam paterna de conservandis Reipubl. seminariis & plantariis; vel aliorum magni nominis famæ & celebritatis Virorum, quibus universis ferendum est grato animo acceptum omne, quod in præsentis & lætis spectamus oculis, & humillimè veneramur mente, manuq; Feliciter! tenemus.

Quemadmodum autem omnis hujus felicitatis causam ex peculiari Dei benignissimi favore, ejusque ope præstantissimè profluxisse rectius agnoscimus, & piè admiramur; par certè admirantibus erit, non in primo limine atque aditu modò, verùm etiam quovis momento, in continuandis laboribus studiisque perficiendis, Nomen Ejus gloriosum summà pietate, reverentiâ ac more sanctissimè habere semper, colere, ac eâ, quâ decet humilitate, Eidem gratiarum hostias immolare.

Nam hujus certè solius fuisse, liquidò jam constat, quod reperi adhuc fuerint, in seculo hoc ferè exulceratissimo, qui ex vero pietatis sinceræ cultores, scholisque faventes, & probare, orbique erudito æstimandos sese sistere, nec dubitarint, nec ullis pepercerint vigiliis, labori & operæ nulli, nullis sumptibus, quin Gratiam, Fidem, pietatem, favoremque in humaniores literas valdè propensum publico quodam testarentur monumento: quique in reparandis, vel admodum ruinosis, vel jam prolapsis ædificiis nullâ ex parte suam paterentur claudicare liberalitatem.

Quod si & omnino par est, decetque benè meritis semper referre gratiam, & summopere cavere, ut debitâ laude ne destituantur: in Eorundem conservandâ beneficiorum memoria, id omnes pro virili parte, strenuè pertendemus, ut si aliud quidem nostris Benefactoribus præmium non promittere & polliceri habeamus, Nomina tamen, ipsorum, virtutes, munera laudesque assiduè recolamus, celebremus, famæ & honori Eorundem gloriæque velificantes, quicquid ab eis nos boni collati unquam meminimus, ab oblivione hominum atque à silentio, modis omnibus vindicatum eamus.

Tales equidem tacere atque negligere, quid aliud videbatur, quam aut parum habere pensi tam egregiorum munerum auctores, aut, quod impium & sacrilegio par est, conculcare ad eò gloriosi Numinis maxima & divinissima bona, abs cujus si esset providentiâ, neque contingere frequentes tam nobiles Heroës, neque exerere virtutem posse, & sic optimè de religione, ejusque officinis mereri, extra omnem dubitationis aleam planè est positum. Hic verò etsi divinum quoddam genus orationis tantæ pietatis res requirere videantur, quod tantum

A

abest

abest à meâ tenuitate, ut infantiam meam, & minus benignam ingenii venam ingenuè agnoscam, & apud Vos, eruditissimos plerosque deprecet humillimè, si magnis atq; eximiis meritis, rebusq; non par respondeat verborum ubertas; siq; in tantorum Principum splendore, me, tanquam ad Solis lumen caligare, aut prorsus succumbere oneri suscepto animadverteritis, favore tamen vestro promptum in honoratum eundo munificentissimos Viros, conatum sublevare, bonamq; interpretari in partem pietatem non desinatis.

Maximè porro aptum laudibus eorum explicandis, nec Vobis, Auditores, fore ad eò ingratum, arbitratus sum, nobile illud Israëlitarum ob tunc recens, sive inventum, sive restauratum puteum, seu fontem amœnissimum, omnium voce & linguâ dulce modulatum his verbis canticum: **HIC IPSE EST FONDS, QVEM FODERE PRINCIPES, CAVAVERE HUNC POPULI DUCES, UNA CUM IMPERATORE, SUI SCEPTRIS.** Ut verò in arcem rei, seu ad ipsum fontem deferamur, haud præter rem videmur facturi, si circumacto nonnihil stilo, præmittamus Vestrà cum veniâ, Xenophontèum illud: **ARTES BONÆ, BONORUM FONTES SUNT,** ante perpensus cogitandum, quàm eò rapiatur oratio, quò collimare pro ingenii modulo instituit, & susceptas partes explicare ingressa est semel.

In hoc igitur argumento, cum universa nostra actio gratiarum versatura sit, à Vobis Excellentissimis & Præ-Nobilibus viris, Dnn. Patronis, Promotoribus, Fautoribus honorandis, majorem in modum peto, benignas mihi commodare aures, & facem addere paratissimis animis semper uberiores in Evergetas cunctos accumulandi gratias, amplificandique pro virili, quos hactenus tot modis & scholæ & unicuique nostrum suâ munificentia & liberalitate concinnaverunt honores.

ARTES BONAS BONORUM FONTES ESSE, elogium certè insigne est à tam luculento scriptore verissimè proditum. Verùm non tam in ipsarum Artium commendationem idem hoc vergere, quàm in Earundem quoque officinarum, non planè alienum erit adserere, si præter arctissimam utriusque combinationem, rem unâ ipsam id apertè etiam loqui, & indice quasi indigitare attentius libuerit perpendere. Equem sanè latere nostrum potest, inter summa humani generis bona, non alia reperiri majora, præter eruditionem ac sapientiam? Quæ, si cui semel facta sunt propria, quid non felicitatis inde sibi polliceatur, qui diu multumque in iisdem investigandis æque ac acquirendis assidue versatus fuit? Næ, fieri non potest, quin cultorem perpetuò omnis generis prosperitates sequantur, & nunquam non circumfluant uberrimi & copiosissimi fructus. Quotum quemque autem cordatorum posse reperiri putemus, qui quidem invitâ talium quid sperare, sibi que optare habeat, nisi ex literarum domiciliis, iisque optimè instructis ante iverit petitum, & singulari studio, assiduâ operâ, velut ex limpidissimo fonte haustum, atque comparatum fideliter, custodiendum existimaverit? Fontibus carere tam est grave, atq; molestum, quam acerbum & difficile est respirare, ubi nulla datur aëris liberioris copia & facultas. Quid, quæso, magis censeamus necessarium in urbe? quid in regione aliqua? Quid in vita mortalium denique conservanda, utilius unquam aut præstantius? quam fontes habere saluberrimos, unde exciteretur in
cunctis

cunctis animantibus naturæ vis, unde alantur commodè, & incrementa capiant indies majora ac robur solidius? Quota quæque dicetur Respublica carere posse artibus bonis earumque officinis? nisi fortè sit, quæ & aquarum copia videatur minus indigere aut desiderare ullorum fontium liquorem? Fontibus acceptum ferimus primum pagorum ortum (quibus postea natales suos etiam urbes debent) quod ex ipsissimo nomine, Græca scilicet dialecto, eis adhuc hærente, latinisque duntaxat notis signato, dubitanti manifestius patebit. Equidem dispartitissimi per agros populi vehementer de aqua, ad communem usum reperiendâ, solliciti, ad puteos passim investigandos maximâ urgente necessitate, compellebantur. Quo semel ut uno atque altero aperto, aliud ilicò, non minus ad vitam tuendam utile ac jucundum possidentibus occurrebat, humanæ nimirum societatis magis magisque habendæ rationis, quâ genus tanto munere præ cæteris animantibus præstans & constare benè, resq; mortalium administrare dexterrimè valeret. Hoc ipsum certè absque arctiori vinculo non rectè posse, nec congruè fieri, prudenter admodum colligebant, nec alio nexu melius firmari & pagos, & quæ ex auctiori agmine, juxta fontes, frequentique magis confluentium populorum copiâ, nascebantur, civitates, quam si animorum cultura, morumq; castigatio, ad omnem honestatem, ad artes ac elegantiam imprimis homines componerent. Siquidem hæc, nec vagari quemquam, more bestiarum permittere, nec laxare habenas temeritati, omniumque odio dignissimæ lasciviæ: pietatem è contra promovere, & imprimere insigniter pudoris atq; honestatis pulchritudinem, & divinæ naturæ exemplar.

Ejusmodi virtutis decus nullius esse, apparet præterquam, cujus ingenium sub magistro solerti, cum cura & singulari dexteritate fictum interpolatumq; auspiciatò prodiit è scholâ. In scholis enim quæ cavere in vitâ, quæq; accuratè observare contra ac sequi & custodire par sit, discamus oportet. Virtus, inquit SENECA, difficilis inventu est, rectorem ducemq; desiderat. Etiam sine magistro vitia discuntur. Hæc in primâ statim herbâ, ne efflorescant, maturis suffocanda & extirpanda penitus, aut animi duris constringendi vinculis, ne sui quodammodo obliiti frangant honestatis clathros atque erumpant. Quocirca, sicut ex purissimâ scaturigine, fonteq; indidem exuberante, nec insistente fluxu, amœnissimos, per regiones latè diffitas, derivamus rivulos civitatibus quàm maximè profuturos: Nec minus pariter literarii fontes, unde Artium cæterarum quædam quasi regurgitatio est, instar amplissimi & inexhausti Oceani, multigenis felicitatis ostia aperiant, seq; per ea in privatam atq; ac publicam vitam prudenter utramq; administrandam, fluminis in morem exonerant. Neq; enim domus ulla erigi sine illis, & constitui, aut res ordinari rectè, multò minus, sacra auspiciatò fieri possunt, nisi rore scholastico singula, quasi dextro ubere, abundè nutriantur, unde quælibet bona & commoda unicuique mortalium propinata, velut haultro excipienda, exceptaque & exantlata in universam hominum societatem porrò per certos canales, perque æqueductus quamplurimos se diffundant usque quaque, transituque expeditiori tandem latissimè deducta terris incrementa subministrent. Quemadmodum autem humanæ artes & doctrinæ valdè caducæ sunt, resque mundanas

danas unicè concernunt; ita nec in divinitatis consortium evehunt aut extollunt se sectantes. Adde, quod parum absit, quin vel à pessimorum Hæreticorum magistris, vel ethnico etiam, doctore Turcico, si non dexteriori, vel salutari magis, pari tamen, ac fortè solerti potius viâ ac modo, molliori ætati videantur posse instillari. Velle autem, tantummodò humanas scientias discendi gratiâ, liberos in ista barbarorum ablegare loca, idque respicere præprimis, ut variarum cognitione, madidum referant pectus, & decumanam jactent eruditionem, id superstitiosum magis affectum, quam Christianum candorem sapere, quistam obesa naris est, quin manifesto sensu deprehendat? Tantum abest, ut ibi locorum magnam scientiæ laudem consecuturi sint, ut Ixionis instar, pro cœlesti Junone nubem, id est, vanissimam eruditionis umbram amplexu fallaci & mentitâ figurâ se occupasse sentiant demum, & imprudentiam institutumque vehementer deplorent. Palmarium in verâ Sapientiâ & doctrina, est orthodoxa Religio, quæ animarum salutem, & incolumitate corporum, & fortunarum bono, longè superiorem, apertè profitetur & certissimè præstat. Eruditio quam sæpe in perniciem vertit. Contra verò DEI agnitio & cultus sincerus & constans fiducia consequendæ olim vitæ cœlestis atque immortalis, sic omnes implent numeros, & præ cæteris faciunt, ut ex vero simus felices, quin, & ipsius admirandæ divinitatis consortes. Sed hæc omnia ex Sapientiæ domiciliis petenda unicè, ibique ad doctrinæ cœlestis virtutisque cultum egregiè imbuenda esse ingenia, ecquis vel negare, aut dissimulare inducat animum? In his, si vero standum, Fontes Israelis latent: Ex his aqua felicitatis vitæ æternæq; effectrix potissimum haurienda est, unde tanta percipietur suavitas & dulcedo, quanta ex sempiternæ Voluptatis prægustu, deliciarumq; abyssu mortalitati præsentis sufficere valet. His laticibus irrigatum pectus, quidni flumina uberrima solatorum, cum securâ tranquillitate, adeò inundent, ut ex ipso æternitatis, Oceano flumine largissimo promanantia bona ad satietatem usq; se hausisse gloriatur? Quacunq; igitur in Urbe hi perennant fontes jugiter, illa præ aliis certè possidere ac tueri dicetur, quicquid unquam divinissimarum rerum mortalibus usu venire solet.

In cujus rei fructu cum felicitatis suæ Summam adhuc tenere, hanc **TORGAM** nostram, non absque gaudio adspiciamus, **DEO** benignissimo omnes meritò gratias immortales agere par est, & ea propter tam felici Urbi cum lætitiâ applaudere, ne aut parum pensi videamur habere divini muneris excellentiam, quod ingrati & infructi foret hominis, maleque feriati; aut invidere communi bono, quod ab ingenuâ indole, & cive probò alienissimum est.

Si pristinam regionum harum faciem, si majorum nostrorum antiquiorem recolere libuerit memoriam, si superiorum temporū rationem **URBIS TORGENSIS** conferre placuerit, inde usque repetentibus, multas Papalium nugarum sordes, nescio quo fato, puteis immixtas venire in mentem oportet, de quibus in constructis hac de re monumentis cum legimus posteri, turbidam quidem colluviem, quâ templa ac Scholæ, adeoque hæ ipsæ ædes, conspurcatæ sorduerunt pessimè, miseramur flebilem in modum: sed virtutem tamen divinamque clementiam magis admiramur in viris divinitus ad repurgandi negotium missis, iisque Principibus maximis, quorum non manibus tantum & animi robore usus est **DEUS**, verum & libe-

liberalitate insigni & opibus largissimè suppeditatis: Quo pacto simul verè principum nomine dignum decus manebit ipsos, ut pro cæteris Fontium jam benè conditorum conservatorumque Auctores illustrissimi toto Orbe perpetuò veniant celebrandi. Et non pari adfectu & beneficio excitati, pari quoque applausu & voce congruamus cum Israelitico choro, ob puteum jam denuò apertum, pleno hilaritatis ore, in DEI pariter ac inventorum, Custodumque laudes hunc in modum erumpente: HIC IPSE EST FONS, QVEM FODERE PRINCIPES, CAVAVERE HUNC POPULI DUCES UNA CUM IMPERATORE SUI SCEPTIS, Omnium annorum retrorsorum numerum inire, rerumque memoriam revocare ad calculum, singulorumque Electorum beneficentissimorum nomina recitare ordine clepsydre spatium vix permittit.

Jam ultra centum annos numeramus alterum ferè seculum retrò, ubi singulari DEI benignitate immortalis gloria scintillantes Principes, fratres binos, sed singulos, ELECTORES SAXONIÆ, interesse mortalibus, inque urbe nostrà, seu contiguà Arce dominando, regionibus cæteris præesse contigerat: Dominum FRIDERICUM III. Sapientem, & DOMINUM JOHANNEM, Constantem dictum; quorum hic Religionis purioris, quam adhuc per Dei gratiam profiteamur, in Augustanis Comitibus se intrepidum Vindicem, Ejusque Constantissimum Assertorem probavit, Cellissimamque Conjugem, in æde B. Virginis apud nos, sub tumbâ post altare novum, extante, viginti; quatuor æneis candelabris inusitatae magnitudinis, sonique diversi per gradus decoratâ in memoriam sempiternam reliquit. Alterius verò auspicio & immortalis virtute, Almam Wittenbergensem, celeberrimum illud literarum ac Sapientiae emporium efflorescere cœpisse, caputque inter nubila excelsa condidisse dudum, quis tam hospitis instar peregrinatur, ut hæc prorsus ignoret? Laudatissimi Utriusque Principis indultu gratissimo factum est porrò, ut Amplissimus hujus Urbis Magistratus primùm Scholam aliquam pro juventute oppidanâ, è regione Templi B. Virginis adornandi impetraverit potestatem, quæ administranda auspiciò legitur fuisse commissa Magistro SCHMIDELINO, Canonico Freibergensi, Viro, qui docendæ juventuti præfuit & ita se comparavit, ut literarum puteum excavare dexterrimè videretur. Qui ob id præcipuè quoque commendandus, quod sic innotuerit, qui MODERATORIS hic feratur habenas tenuisse omnium primus; successoresque is habuit postea non minori gloria, quam meritis in rem literariam Clarissimos, N. VADINUM, putâ, GEORGIUM LÖSERUM, BENEDICTUM FLEMMING, MELCHIOREM FENDIUM, Suevo Horlingensem ex Academia Wittenbergensi accersitum, eoque post paulo reversum Doctoris Medici & Professoris nomen, partesque ultra annos quadraginta sustinendo incomparabilem famam ex liberalitate quoque consecutum. Post cujus discessum Schola hæc non proletarium Virum recepit M. MARCUM CRÖDELIUM, Vinariensem. Quam hic ipse charus B. Domino LUTHERO tunc temporis exstiterit, libelli non uni testari possunt, quos Tantis Vir à se exditos huc transmittere & donare suo CRÖDELIO non fuit de dignatus. Cujusmodi exemplum Bibliotheca nostra, Excell. Dn. JACOBO THOMASIO Acad. Lips. P. P. donante liberaliter, possidet, ipsius Megalandri manu & lemmate ejusmodi ornatum; M. MARCO CRÖDELIO Formatori pueritiæ Christianæ Torgens. suo Fratri Charissimo MART. LUTH. D.

B

Hæc

Hæc dum beneficia in Christianam Rem, urbemq; hanc publicè collata, privatim interea hæserunt in monasterio nostro, Fratres quidam S. FRANCISCO addicti, gratiam meriturine, an iram potius & indignationem, nihil nunc attinet disputare. Simul atque verò in Wittebergen- sium campis orthodoxus Lutherus fontes sacros multifariam hæctenus obstructos à cœno sordibusque errorum Papalium purgare incepisset, at- que ilicò rivorum decurrentium allapsu, aliæ quoq; in vicinia regiones aquæ salutaris penuria admodum laborantes, cum urbibus uberius irri- gari visæ; Hæc quoq; TORGA, Urbs ELECTORIBUS suis semper grata & amœna, incomparabili istà felicitate, & divino plane mactata dono, hæc paucas fermè superare se, non sine admiratione gavisa est. Idq; tantò majore successu, quanto in exantlandis piis ejusmodi laboribus prom- ptiores invenerat cives; Urbs verò Clementiores Principes ac Electores, magis pios & omni laude superiores.

Hi ergò ipsi sunt, quos respicias, ò TORGA, quorum & memori- am habeas benignè, manibus beatis flores spargendo plena manu, diutissi- me qui vigeant ac durent, occinasque faustà acclamatione: HI IPSI SUNT, qui fonticulum hunc scholasticum sceptris suis providè & fode- runt, & purum putumque cum, qua tuendo, qua conservando verita- tem, præstare nihil non, & subire discrimina tanta paratissimi fuerunt semper ac promptissimi. Quibus certè nisi grates persolveremus, si non, ut par est, debitas, commemorando saltem & pio meritorum præconio, jure omninò essemus omnium ingratisissimi censendi. Sed cum flumini- bus ita esse comparatum videmus, ut de fonte ipso magis magisque au- cta majores subinde incipiant volvere undas, eoque limpidioribus pau- lò ferri soleant alveis, quò à purioribus iisque largis capitibus traxere ortum; Ita ipse B. LUTHERUS: singulare illud ad munus hoc electum organon, frequens & exoptatissimus semper in hac Urbe, hospes, pecu- liari ejus delectatus Genio, favore suo semper complexus est TORGAM, & in Ecclesià pariter ac Scholà ordinandà magis, puriusque constituendà jux- ta atque amplificandà, quàm Ecclesià & Scholà in monente & salutaria proponente LUTHERO auscultando, eique tenacissimè adhærendo certavit, utraque parte ex voto victrici. Consecraverat primum sermo- ne orthodoxo Aulici Sacelli cathedram: deinde & in Urbe, ad B. Virgi- nis, Templum alterum parochiale divinis concionibus Ejus & sermoni- bus resultavit personuitque, non sine ingenti omnium salute ac fructu. Quod idem postea quoque Excellentissimæ Conjugi Lutheri CATHARI- NÆ à Bora, Torgensis Civis quondam ope ex Cœnobio Niemecensi li- berali manu adsertæ, postque B. mariti obitum, hîc loci pestis tempore, cum universitate Wittebergensi commoranti & fato defunctæ, præstito solenniter exequiarum officio, luculentum tumulum præbuisse, ubi cor- pus exoptatissimà quiete fruatur, sibi non minimæ duxit esse laudi. Quantum, bone Deus, exinde laborum susceptum fuit hac ipsà in Urbe, circa hunc fontem, ob conservandam puritatem cœlestis verbi & ortho- doxæ religionis promovendum negotium, sicut factum à LUTHERO spi- rante adhuc, ita etiam à fidelissimis parastatis Ejus & successoribus con- tinuatum? Quæ non consilia hîc agitata gravissimæ hujus rei causâ, & quàm feliciter, post diuturnam deliberationem, vel eodem hoc in lo- co, vel alibi tandem cum prosperrimo successu fuerunt expedita? Hæc si in unum conferamus, non parum certè exornatam conspicuamque
nostram

nostram reddere gestiunt TORGAM, ut vel ausit non paucas provocare, quibus in magnâ fortunâ par deest gloria. Huic enim Urbi Natalia sua debet pia illa orthodoxorum CONFESSIO FIDEI sincerâ, Augustissimo Imperatori CAROLO V. Augustæ Vindelicorum omnium nomine luculenter exhibita, quam ante primis velut lineis designaverat hîc TORGÆ LUTHERUS Ejus Auctor, simul ac illi Ejusdem conficiendæ negotium dedisset SERENISSIMUS ELECTOR SAXON. JOHANNES ille Constans, jam jam ad Comitiam cum ProElectore JOHANNES FRIDERICO, cæterisque Præpotentibus Dominis ac Principibus Augustam profecturus: cujus paulo post natam prolixiorum explicationem cum Apologiâ adfertam Christianus orbis non sine applausu excepit. Hoc aureo opere quam præclarè consultum fuit & doctorum partibus, & studiis ingenuæ juventutis, addo, universæ vitæ commodis, in quâ non minus erumpit & dilatat se usque quaque, quicquid ex hoc fonte divinius humano generi impertivit immensa Dei bonitas!

Hîc Torgæ fontes S. Bibliorum, ut in vernaculam dulcissimam derivarentur, sua invenerunt privilegia. Fa enim indultu Sereniss. Electoris JOHANNIS FRIDERICI, optimi parentis pari religionis Zelo vestigia secuti Vêrsioni B. LUTHERI gratiosissimè hoc ipso in loco leguntur olim tributa. Hic ipse verò Elector, quantum pietati atque exercitiis Scholasticorum faverit, luculentissimè docere potest, quod à prole majori natu, Principe tredecenne, JOHANNES FRIDERICO, in aulâ Torgensi, quâ natus fuerat, specimen aliquod suorum in oratorio studio profectuum, ex memoriâ, sibi parenti, proceribusque aulicis præsentibus exhibendum instituit, censuitque illum ab his & ejusmodi ætati convenientibus studiis ad potiora progredi feliciter, & inde paulatim posse contendere ad summa & magis profutura. Idem ipse jam laudatissimus Elector parens huc Torgam accersivit B. LUTHERUM, Dn. PHILIPPUM MELANCHTHONEM, & alios, quos cognoverat fidelissimos religionis propugnatores, quotiescunq; religioni cavendi causâ salutare quippiam deliberandum esset, sollicitus admodum, ne tanto labore semel parata veritas cœlestis fortè in damnum verteret, aut cum ingenti malo Constantissimorum Confessorum disperderetur. Id quod subinde factum legimus, & tum quoq; cum jugulanda esset oppido perversissima opinio AN-TINOMORUM, quæ unâ cum suo antesignano, Doctore Jacobo SCHENCKIO, quem D. LUTHERUS, per ludum atq; jocum, JEKELIUM appellitare solitus, ab eodem Megalandro prorsus profligata, occisa atq; eversa evanuit.

Cumque tot præterea conventus sicut alibi, ita & Torgæ frequentissimè institutos reperiamus, in quibus præcipuum, de more, caput, & palmarium esse solet de religione, de Ecclesiis, de Scholis consultandi, jure merito veneramur tantam scholarum quoque æstimationem, quarum causâ tam Principes viri in adserenda earundem incolumitate se potissimum patientur occupari. Numerum inire omnium annorum, quibus Patres Conscripti ex ditionibus Electoralis Saxoniz, Misniæ, Thuringiæ, aliarumque, ejus rei ergò, hûc quoque descenderint non esset quidem difficile, quippe qui in promptu est, modò non ad alios etiam Principes præclari fontis hujus itidem Fossores insignes, & ad Præsides festinaret calamus. Eat in omni ævi memorias HECTORIS GERMANIÆ, Turcarum verò terroris, Domini MAURITII Electoris Saxoniz, pro aris & focus optimi statoris illustrissimum studium, non fodiendi tantum, excolendique & tuendi hunc fontem, tam
B 2 insigni

insigni suo tot laureis & triumphis distincto sceptro, sed ei quoque post
B. LUTHERI obitum vires ac opes suppeditandi, ut liberiori scaturigi-
ne exuberaret magis magisque ac promoveretur. Non satis illi Heroi
erat egregia bona Collegiorum in Academiam Lipsiensem conferre: sed
præter ea, tria quoque Athenæa, Illustrissimi hujus Electoris splendore
coruscantia condenda curavit, partim Misenæ, partim Portæ, partim
Merseburgi, quod tamen postea aliò translatum est, & hodierno tem-
pore Grimmam pro alma agnoscit, memoriamque Conditoris benefici
gratissimâ recolit mente. Verùm nec nobis deest, quod Eidem gratis-
simo animo acceptum feramus, quodque nostrum fontem commendare
proprius videatur. Hujus enim Electoris ac Principis sempiterni nominis,
Dn MAURITII auctoritate factum est; ut anno quodam pestilentissimo,
Academia, Witteberga juberetur ad tempus certum TORGAM transmi-
grare, quod hujus loci Genium Proceribus Academicis & studiosæ pu-
bi magis convenire intellexerat, quàm alterius fortè, quantumvis me-
lioris. Quotum quemque non affecisse jucundissimum spectaculum
arbitremur? videre huc migrantes tot Excellentissimos unâ cum uni-
versa studiosorum, eaque egregia cohorte, quique sub discessum, se
hîc ab incolis adjutos omnibus hospitalibus officiis, gratitudinis ergò,
haud disimulando beneficium, publico scripto profiteri non dubita-
runt. Quam strenuè interea temporis illi hîc operam in fonte schola-
stico ulterius eruendo concinnandog; collocarunt? Quam naviter cun-
cta ordinarunt in fluxum expeditiorem, viresque & incrementa majo-
ra acquirenda? Fuit eo semestri Rector Magnificus Dn. LINDEMANNUS,
J. U. D. cujus vices non ratò Dn. PAULUS EBERUS, Physicæ tunc Professor,
ac deinde S. S. Theol. Doctor & Superintendens Wittebergæ, Generalis
(cujus imago hîc ex altero latere Melanchthoniæ juncta conspicitur)
administrafse, publico edita nomine scripta testantur. Opportunum
ipsis præberi videbatur hospitium, quod annuente Magistratu oppidano,
iis cecidit Monasterium novum, ubi invicem ita distribuiffe comperimus
auditoria, ut ex inferioribus duo contigua binis obtigerint Facultati-
bus, Juridicæ alterum, alterum Medicorum, idemque nonnunquam
Consistorialibus patuerit negotiis: superius autem hoc nostrum videli-
cet, tunc inservire commodum est visum, ut Theologicis pariter ac Phi-
losophicis consecrareturacroamatibus. Hoc personare audiffes suavis-
simâ voce hujus B. PHILIPPI, propinantis frequentissimæ Adolescentum
coronæ jam augustissimam partem de duabis in Christo naturis, jam de-
finitiones Theologicas, ut ipse vocat, jam Epistolam quoque Pauli ad
Romanos tramissam studiosis utilissimum commentarium. In locis ad-
huc Theologicis sudare inveniffes Dn. HESHUSIUM; PEUCERUM por-
rò in Spharâ, in Arithmeticâ, in Euclide enucleando unâ occupatum
salutasses, aliosque alias operas conferentes, inq; cæteris deinde Acroa-
teriis pro suggestu quemlibet partes suas tuentem egregiè. E quibus
nominare licet Viros Consultissimos & Experientissimos, Dn. SEBASTI-
ANUM THEODORICUM, VITUM ORTELIUM à patriâ Winshemi-
um alias appellatum, Stellam, & qui cæteri, insigni doctrinâ & virtute
illustres Viri, se istis unâ conjunxerunt, de quibus iterum ingeminandum
fas esse censemus: Hi Doctores Academici baculis suis tam amœnum
& salutarem fodere fontem, nullam neglexerunt occasionem, ejusque
custodiam, Magistratui Christiano fideliter commendatam & quasi per
manus

manus traditam & relictam esse voluerunt. Nec illi unquam suo hactenus defuere officio. Imprimis autem post Academicorum abitionem & discessum, adeò jucunda videbatur res Amplissimo Senatui hujus Urbis, ut apud Serenissimum Electorem sollicitè agerent, de suo fonte scholastico ex pristino campo & platea parochialis Templi muros externos secuta, domoque vetusta non procul ab Electorali penuario, jamque à Gersdorffianis occupata, in Monasterium hoc, tum temporis vacuum, derivando, tandemque adipiscerentur alio transeundi potestatem. Quanto igitur cum gaudio existimemus Musas ex veteri domicilio in sedem sibi de novo paratam migrasse, exulantibus inde & Franciscanorum tricis, & remotis dein armamentariis quibusdã, ad tempus exiguum in Monasterii istius cameris tunc asservatis? Occuparunt lætæ subsellia sibi constructa, secutæ Ductorem suum Mag. JOHANN. MOSERUM Argentinensem tunc partes Rectoris, post CRÖDELIUM supra laudatum, feliciter & non sine laude tenentem. Quem porro, temporibus succedentibus, alii nec minus strenui fontis hujus tum fossores tum custodes exceperunt, quorum nominibus recensendis breves erimus, ne audientium animos & aures prolixiori oratione in patriæ rebus fatigemus.

Successerunt autem M. MARTINUS OBENDÖRFFERUS, de hinc Witeb. Prof. Publ. ac tandem in Patriâ ejus Mitvveidâ Pastor. SIMON STEINIUS Lomacensis, Budissinâ accersitus, qui vix exacto triennio in Palatinatum discessit. M. Georg PEUCERUS Budissinus, (Caspari frater) cui tres tantummodo annos munere Rectoris defuncto; Acta fori Cotbusiani amplecti placuit: M. Michael BOHEMUS, Pirnensis ex Lipsiensium Thomanâ huc evocatus, per unum, ConR. & per quadraginta annos, Rectoratus habenas non sine ingenti famâ moderatus est: M. AUGUSTINUS PREILIUS, Torgensis, qui uno anno elapso cessit Zittaviam: M. Georg. GLAUCH, Cizensis, ilicò ad Diaconatum aspiravit, tradens facem anno finito, Dn. M. JOACHIMO MEISNERO, Elistrovverdensi, antea Lipsiæ ad D. Nicolai Collegæ, hîc verò per triginta annos Rectori optimè merito, Præceptoris meo, socero ac Prædecessori æternum honorando. Horum omnium animus & ardor in eo totus fuit, ut cordatè admoverent manus ad fontis tam auspiciò effossi integritatem & puritatem tum conservandam, tum pro cujusq; ingenii ope communicandam quotidie auditoribus sibilundis divinæ juxta atque humanæ sapientiæ, unâ cum literis optimis salubres doctrinas. Memores quippe erant, quàm sollicitâ vigilantia PATRES PATRIÆ, præter superiores cum æternâ laude recitatos, in hac Urbe veteri ELECTORUM sede, cæteri pariter ELECTORES ac Principes Maximi consulere voluerint religionis, Ejusdemq; fontium sincerati. Non enim frustra certè ac nequicquam per aliquot annos diversis vicibus rotatos conventus, modo à Pientissimo Electore AUGUSTO, sedecim Theologis excellentissimis de cavendo CALVINISMO huc accersitis, iterumq; biennio peracto, de conscribenda FORMULA CONCORDIÆ, quam, haud immerito dixeris orthodoxæ doctrinæ Palladium, jam ante ipsos centum annos hîc Torgæ primum curante B. AUGUSTO, editum: modo ab Eiusdem Serenissimis Filiis & successoribus in imperio eò unicè respicientibus, ne quid vitii contraherent fontes, quod exinde redundare posset in universas Ecclesias non sine maximo detrimento ac damno Reip. & salutis. Hinc factum, ut post maturimum Domini Electoris

C

CHRIST.

CHRISTIANI I. ingentis atque excelsi animi Principis obitum, conscripti sint hic, Torgæ, sex & viginti illi Articuli visitatorij. purioris doctrinæ assertoribus, vindicibusq; sedulo commendati, operâ laudatissimi Electoratus Administratoris, Dn. FRIDERICI WILHELMI, qui quum minoribus Ducibus Celsissimis præset hic commoratus, omni tempore in eo sudavit, ut fons noster planè liber, & ab impuro cœno Calvinistico repurgatus aquam saluberrimam solerter extrahentibus suppeditaret uberrimè. Hujus vice parentis pietatem, ac prudentiam eò feliciter arripuerunt, indefessè secuti Ducis & Tutoris sui optimi exemplum, Dn. CHRISTIANUS II. & JOHANN. GEORGIUS I. (minimus enim natus in primo flore annorum obiit AUGUSTUS.) fratres immortalitati jam dudum consecrati, & post illud tempus ipsi Electores omni laude majores, quorum ætas, ut in toto orbe Christiano decantatissimum & Illustrissimum incidisset ADMINISTRATOREM; ita facilè assuefacti maturius sceptrorum suorum culmina non tantum usurpare in ijs, quæ regnum & ditiones concernebant, sed humillima quoq; initia ortusq; rerum sublimium, scholas putato, attendere, nec hoc infra suam Majestatem esse positam autumare. Quorum omnium exempla & modernum nostrum Serenissimum & Potentissimum Electorem ac Dominum, Dn. JOHANNEM GEORGIUM II. invitarunt magis, ne quâ & ipse hic suis se majoribus inferiorem ostenderet, immane, quantum laborantè, ne intercitant scholæ, neq; turbentur puri fontes Israelis, Res omni laude & Principe digna erat, cum ante non ita multos annos, per Universam Saxoniam missi undiq; & Nobilissimi Heroës & Theologi excellentissimi, exploraturi accuratius, quomodo se habeant jam in quolibet Urbe ac regione tota cujuslibet tam providè effossi à Principibus fontes? quam occupatus quisq; sit, quàm strenuus, tam in laborando ulterius quam purè iisdem conservandis & derivandis? Limpidine adhuc rivuli in campos manent, & quàm latè longèq; deducantur? Num moles forte aliqua eis sit opposita, lignave impediunt liberos cursus? Hæc beneficia sunt boni Magistratus: Hæc auctoritatem & splendorem augent: hæc spem promittunt melioris felicitatis & bonorum omnium ubertim nunquam non affluentium. Quid in præsentis facti, de eo jam porro dicendum esset, nisi nunc de fontibus disserens ipse destitueret orationis fonte, dum aqua hic mihi hæerere incipit, nec dicendi vis ulla amplius ad pietatis & adfectus plenos effundendum rivos, & exultationum ubertatem, sufficere videtur. Moderni Serenissimi ELECTORIS Saxonum, Domini nostri Clementissimi maxima merita exactius reputantes, & quam curam, quos labores, in repurgatis fontibus peræq; adserendis susceperit, quæ præstiterit beneficia, quæ contentione, æquè atq; Serenissimus Ejus parens Dn. JOHANNES GEORGIUS I. beatissima memoriæ, olim pro religione, pro templis ac Scholis, contra insidias machinasq; feriatarum steterit & pugnaverit, memoratu dignum reperiemus exemplum, quod ut in omni ævi memorias ferendum, ita alterum alteri recensentem, lætitijs omnibus incedere, & sibi, & inclytæ Torgæ de fortunâ auspiciatissimâ non immeritò gratulari oportebit. Est enim proculdubio, omnibus in conspectu adhuc positus SERENITATIS ipsius ardor, ingens illud & incredibile gaudium, quo nuper peracto seculo CONCORDIÆ CHRISTIANÆ Torgæ primùm elaboratæ, & in splendidissimâ Arce, antea pietatissimo AUGUSTO, Electori prudentissimo exhibitæ, solennitatem publicè cum universo Procerum Aulicorum choro exceperit, certo ritu ac ceremonijs, sacrâ concione, canticisq; & gratijs DEO reddendis ita hæc læta auspicia celebrando, ut inusitata frequentia ex alijs peregrè locis huc con-

volan-

volantibus ad spectandū, pientissimus Elector pari videretur eoq; ferven-
 tismo teneri desiderio, quo sanctissimum olim Regum, Davidem sitibun-
 dum ex fonte Bethlehemitico hauriendi aquā, vix sine ingenti portantium
 discrimine, petitam flagravisse, sacra nos docent monumenta. Ingentem in
 modum lætabatur Optimus Electorum, Deum ter Optimum Maximum cœ-
 lestis doctrinæ, ante centum annos repurgatæ integritatem sinceram, pu-
 ram & incorruptam servasse gratiosè, ad hunc usq; diem, ut ex eâ, ceu salu-
 tari fonte unicuilibet suæ potestati subditorum, cum alijs infinitis, licitum
 sit petere omnis salutis & felicitatis, denique omnis abundantissimam co-
 piam. Nec contentus erat tum rebus Religionem promoventibus ita con-
 sulere & providere, nisi ad se quoq; pertinere existimasset fontis simul scho-
 lastici habere rationem, ejusq; tum restaurandi, tum splendidissimâ Lega-
 torum, Illustr. Lib. Baronum, Theologorumq; summorum Electorali nomi-
 ne, tum has ipsas sedes occupantium auctoritate & præsentia in actu solen-
 nissimo Acroaseos inauguralis à plurimum Rever. Dn. Superint. D. PAU-
 LO HOFMANNO institutæ, clementissimè decorandi, mactandiq; bene-
 ficio admodum gratioso, liberali, & nunquam non cum laude summâ po-
 steritati memorando. O niveo digna lapillo, & cedro per omnes spargenda
 annos dies, quæ hactenac admirabili spectaculo scholam nostram exhilara-
 vit! O sedes Musarum beatissima! Tibi recensere & intueri licebat ordine,
 venerariq; à Serenissimo Electore gratiosè tibi peculiariter consecratos
 maximè Illustr. Liberos Barones, Legatos, Dominos Generosiss. Dn. CA-
 ROLUM à FRIESEN, Ecclesiasticarum rerum Præsidem Eminentissimum; Dn.
 NICOLAUM à GERSDORF, ab intimioribus Consilijs utrumq; & divinis doti-
 bus valdè insignes Heroës. Maximè quoq; Reverendum & Magnificum
 Dn. D. MARTINUM GEIERUM, à consilijs & confessionibus sacris & concioni-
 bus Aulicis Primarijs, virum de Ecclesiâ orthodoxâ optimè meritum. Quā
 jucundū erat numerare post deinde selectissimos Theologos, Doctores to-
 to orbe celebratissimos: Dn. CALOVIOS, MEISNEROS, SCHERZEROS,
 LEHMANNOS; hos ex Lipsiensi, illos verò Wittebergensi Academiâ, post
 alia gravissima expedita negotia, ad inauguralem hunc actum descen-
 dentes, & cum Consiliarijs Electoralibus alijs, atq; Prænobilibus & sum-
 mis, Dn. MELCHIORE von Schlomach/ in Welsch & Gebersdorf intimioris
 Militiæ & Camer. Elect. Consiliar. Dn. CHRISTIANO LORENTZ ab
 ADLERSHELM, Cæs. Majest. & Elect. Saxon, à Consilijs Scabin. Lips. Asses-
 fore & Reip. Consule: Dn. Gabriele Voigtio; Elect. à Secretis, Ex-
 cellentiss. ac de re literariâ benè meritis; cæterisque quamplurimis ex Aulâ
 ELECTORALI Viris, scholam hanc decorantes, radijsq; suis eam illustrantes
 conspiciere! Si votis esset locus, jam mihi optarè dari labra fonte Caballino
 proluta, ut omnes numeros grati animi beneficia celebrantis perfectè im-
 plere possem, atq; deprædicare, ut decet, maxima hæc beneficia benignissi-
 mi ELECTORIS, & humanitatem studiumque singulare Præillustrium & sum-
 morum Dominorum LEGATORUM, qui, magnâ cum laude suas partes im-
 plendo, mirificè animos omnium in sui admirationem rapuerunt. Demis-
 sè hic illis deponimus gratias, & cum nullus verborum apparatus suf-
 ficiat tot nominibus recensendis, nedum dignè laudandis, gratijsque sol-
 vendis, profiteamur, Iisdem mancupio totos fore, & quo major, ex Ele-
 ctorali gratiâ, & Dominorum LEGATORUM promptitudine, honor in
 scholam hanc, addo & totum scholasticum ordinem redundavit, eò
 promptiores nos inventum iri ad agendas gratias, precesq; ad Deum pro
 perpetuâ Eorum incolumitate, & largissimâ benedictione divinitus impe-
 trandâ humillimè fundendas. Interea porrò alacris nostra in scholis &

efferet & jactabit inde se pietas: & quantum latitiæ in animis coarctatum latuit, quicquid Gratiarum intra carceres pectorum æstuavit, jam impetu facto prorumpet, totisque haustis vel navibus gratulabundarum, vocum in SERENISSIMI ELECTORIS munificentiam se exonerabit, ingeminando fortius canticum: HIC IPSE EST FONS, QVEM FODERE PRINCIPIES, CAVAVERE HUNC POPULI DUCES, unà cum IMPERATORE suis SCEPTRIS. Tua enim hæc, Munificentissime ELECTOR, Tua inquam Liberalitas est, & Gratia, quod in medio Auditorii hujus, ex fusili ære ingentis molis conflatam & fabrefactam, cernimus ac admiramur fornacem: Tuum munus est, quod egregiam porrò argenti summam ad ornandum hoc Auditorium insuper addere, gratiosè, non fuisti dedignatus, ut quam promptum habeas animum, sicut in templis conservandis condecorandisque; ita non minus in scholis earumq; succurrendis ædificiis, iisve restaurandis, liberalis ista munificentia universo orbi satis decantata cunctæ ætati celebretur. Hæc tua munera, Tuas virtutes maximas oratione & omni voce augustiores, pietate & devoto adfectu, humilique obsequio venerabimur æternum, indefesso studio ac diligentia adnixuri, ne parum grato ac memori coetui hic honos habitus ulli videatur. Æternus ille arbiter & Remunerator Deus, Te Elector benignissime, servet incolumem & salvum adhuc per plurimos diutissimi seculi annos; servet Illustrissimam domum & Aulam, cum universa gente Celsissimâ ac numerosissimâ: vivant omnes in pace exoptatissimâ, vivant diutissimè, & inoffenso tenore felicitatis, vivant perpetuâ gloria & salute abundantes. Gaudeas ELECTOR optime, videre salutem & prosperitatem Tuorum, videre florem & pacatum statum omnium provinciarum. Faveant Tibi propitia Numina, ut rebus afflictis & concussis per omnia mederi queas, integris verò & fartis tectis dare perennitatem. Simili pariter, devotione, ardore & humilitate maxima illa, Reverendissimorum Dominorum Fratrum, Domini CHRISTIANI, & Dn. MAURITII, Ducum Saxonie &c. &c. Illius Præfulatus Mersburgensis; Hujus verò Naumburgensis & Cizensis, laudatissimorum Administratorum, Dominorum Clementissimorum, nomina veneramur. Est enim ipsorum etiam gratiosam beneficentiam ac liberalitatem ingentem, experta hæc schola, eaque propter submissa reverentiæ & plenioris gaudii significatione ILLUSTRISSIMIS PRINCIPIBUS & PRÆSULIBUS Reverendissimis gratias habet, quas potest maximas, nec erit ullum tempus, quo non insignia illa munera ante oculos nostros quotidie obversantia novâ voluptate & gaudio nos perpetim mactent, stimulum acrem additura intuitibus, ut eximia & egregia munera omni voce, omni laude, gratissimâ mente æternum veneremur. Res gaudii plena erit, Inclytæ SAXONIÆ DOMUS PRINCIPIES semper & ubique salvos, incolumesque ac florentes omni seculo, ut votis optare possumus, admirari & suspicere, identidemq; lætandi juxta ac gratulandi, in uno quoque Eorum, quotidie causas invenire. Nihil sanctius aut majus sacris Eorundem pulvinaribus inferre nobis reliquum est, præter quàm humillimum votum: ut benè cunctis sit, ut vivant diutissime, regnent, triumphantque feliciter cum Celsissimâ posteritate longè lateq; auspicato diffusa. Interea nos beneficiorum acceptorum semper memores ingeminaturi sumus, iterum atque iterum perquam læti recinentes: HIC IPSE FONS, quem fodere PRINCIPIES, cavavere hunc populi DUCES, unà cum IMPERATORE suis SCEPTRIS.

Uti

Uti autem Deus hoc beneficii genus
pes in hanc Scholam conferri annuit; ita
dentia agnoscenda est & prædicanda summo
huic Fonti sollicitos admodum, non tantum restauranda, sed egre-
gio bono, quam liberalibus donis, opeq; & munere suo, ei succurrentes
excitaverit perbenignos Patronos & Fautores optimos, qui & parariam &
auxiliatricem omnium operam præstarent fidelissimè. Cum enim hæ
ædes scholasticæ, (ut ab ovo rem accersam,) ante id, propter penuri-
am ærarij, & propter calamitosa admodum tempora, immane quantum
fecissent vitium, factum est divino quodam fato, ut Dn. CHRISTIANUS HUF-
NERUS, Nobilis patricius, huic scholæ fautor, dum viveret, valdè insignis,
centum florenos restaurando ædificio, pro suâ liberalitate ex Camerâ E-
lectorali, concederet lubens, unde suppeditarent sumptus & reparandæ
& solidius firmandæ scholasticæ huic moli. Ob quam benevolam ope-
ram jam modò post obitum ideo commendandus HUFNERUS est, quod
prima velut hujus operis perficiendi jecerit fundamenta, novis acces-
sionibus magis magisque post deinde exstruenda & ad ultimam usque
exequenda colophonem. Quæ certè res, B. HUFNERE, licet jam humano
confortio nostro sis subtractus, meliorique redditus, Tibi Tuisque ta-
men futura est honori, quamdiu floruerit hæc Torga patria: (florebit
autem, quod ex animo voveo, donec universa mundi solvetur machi-
na) & apud Deum certè istarum impensarum nunc optima constat ra-
tio, fructusq; istius rei & beneficij uberrimus, dum tibi propinquantur
ex perenni fonte, qui nunquam exaret, nunquam mutatur, dulcissimæ
aquarum in omnem æternitatem abunde sufficientes. Quem verò Ve-
strum, Auditores, latet? multa sæpe solere obstacula intervenire mul-
taque impedimenta, quæ obsident profluentes, remoramque objicien-
do sufflamine velut comprimunt retinentque, ut difficulter aquæ mo-
veantur, & ipsi fontes non rarò saxi lignisve oppilati fluxu solito pro-
cedere planè desinant, totusque aquarum intervertatur usus? Id ne ac-
cideret scholastico huic fonti Torgensi, tua, Doctor HOFMANNE, cau-
tio fuit maximè. Quicquid enim difficultatum emerferat, confuta-
sti oppidò autoritate tuâ, dum nec Hüfnerianam modò donationem
obtinuisse contentus, sed cumulum addere insuper validiorem & bo-
ni Antistitis & veri Scholarum Patroni laudatissimum in modum indu-
xisti animum. Certè in manu nostrâ nihil est, quo expungamus no-
men, aut tantis vigilijs curæque ac providentiæ & donis, ut par est, di-
gnas deponamus gratias. Conabimur tamen quantum licet, tua bene-
ficia prædicare posteritati. Et en! totum hoc Acroaterium, hæ imagi-
nes universo orbi notissimæ, imprimis hæ beatissimi Doctoris & Theol.
PAULIEBERI, tuum munus, & in nominis tui memoriam insigne mo-
numentum; cum altera pariter PHILIPPEA, suavissimi Collegæ tui dono;
hæ cathedræ, hæ scamna ac subsellia, & ista de novo picta laquearia
hic nobiscum conspirant, unanimi voce gratias Tibi agentes pro omni
operâ, sumptibus, studio & labore, per hoc tempus in Dei honorem
& scholæ commodum felicissimè à Te exantlato. Liberalitas excita-
tur commendationibus, quæ eò facilius penetrant ac movent efficacius,
quo splendidiore luce fulgent viri, à quibus profiscuntur. Nam fides
stat autoritate; & quicquid petunt, qui Principibus antè se probave-
runt sæpe, non parum favoris & clementiæ aliis quoque impetrare pos-
sunt. Triumphat in hoc schola nostra, & quanta quanta est, exultat
tam præclaro bono, tantaq; felicitate. Etenim fidissimo interprete,
& commendatore præeximio, Dn. Antistite eodem non solummodò ca-
pita celsissima, nunquam satis laudanda, indulgentissimè se adduci pas-
sa sunt,

er petitis; sed complures etiam alii in
 ordinum Viri Generosi, Prænobiles, Ex-
 cellente, consilio, Rerum usu & Prudentiâ,
 admodum spectabiles, Domini, Doctores,
 Licentiati, Consules, Rei Quæstoriæ & Aulicis expeditionibus Præ-
 fecti & Administratores, Ecclesiastæ, Prætores, Senatoresque & cæte-
 rorum ordinum optimorum Viri integerrimi, unâ fuerunt permoti, ut
 faciles descenderent in vota ac scholæ desideria, quorum nomina Ce-
 drino succo conscripta sunt, omni tempore cuiusvis legenda pariter & ce-
 lebranda ab illis, quicumque scholastica limina, hîc apud nos salutare
 instituerint. Et sic juxta præclarum hoc monumentum, quod hodie
 quoque apparet, venerabiliter Nominum pariter sequentium recorda-
 bimur grati. Tui, Illustris Eques ac Generose, Domine CHRISTOPH BERN-
 HARD à WALDAU, Sereniss. Rlect. Saxon. Comes Cubicularie, præsidiorum
 copiarumq; Torgens. Præfecte & c. Tui admodum Rever. & Excellent. Dn.
 Paule Hofmanne, S. S. Theol. D. & Superint. Capituli Wurzens. Præposi-
 te meritisime: Sic & Excellentissimorum Doctorum & Licent. Domino-
 rum. Dn. Christiani Fickelscheri, J. U. D. & Pract. Dn. Christiani Friderici
 Iahni, J. U. D. & Practici, Dn. Christiani Hermanni, J. U. D. Consulis & Pra-
 ctici, Dn. Pauli Schröteri, Medic. Licent. Consulis & Physici Ordin. Dn.
 Iohannis Wollersheim, J. U. Licent. & Pract. Dn. Gabrielis Richteri, Elect.
 Armamentario Campestri & Quæstoriis Rationibus Præfecti, Dn. M. Petri
 Kistenmacheri, ArchiEpiscopalis Collegiatus Magdeburgensis ad D. Ni-
 colai Canonici ut & Ecclesiæ hujus Torgensis Diac. fidelissimi. Dn. Iohan-
 nis Ganzlandi, Prætoris, Dn. Michaelis Henningi Prætor, Dn. Christiani
 Fritzschi Prætor, Dn. Joh. Sam. Ringenhahni Elect. Oenothecæ Præfecti,
 Dn. Iohannis Kunzii Senatoris, Dn. Iohannis Nicolai Vogelhaupti Senator,
 Dn. Iohannis Crusii Hæredit. in Grefendorff. Vestra enim hæc sunt, Do-
 mini, vestra inquam hîc prædicamus munera, & sunt, quæcunque hîc cer-
 nitis circumcirca, sive æra occurrant, sive pictæ imagines, cathedræ,
 instrumenta musica, sedilia, tabulæ, asseres, omnes colores & ornatus, &
 quicquid novi in conspectum prodit, omne, Deo sit laus & gloria! Ve-
 stræ est gratiæ, vestræ liberalitatis & benevolentia. Fecit hoc pietas
 vestra erga Deum: fecit favor, studium & singularis affectus, quo primis
 statim ab annis unumquemq; vestrum ad complectendas scholas propen-
 sum fuisse ipsa omni ex parte loqui videtur liberalitas. Vobis ut grato
 animo & devotâ mente pro his muneribus quam diutissimos eosq; serenos
 apprecamur dies, juxta atq; annos quamplurimos, cum multifariâ omnis
 generis benedictione; ita faces & stimulos pungentes jam sentiunt pectora
 nostra, quibus quotidie magis ac magis excitabuntur ad promptissimam
 gratitudinem jure vobis debitam, erumpendo iterum iterumq; in carmina
 laudum: Hic est fons, quem fodere Principes, cavavere hunc populi Duces
 unâ cum Imperatore suis sceptris. Ejus rei gratiâ & TE, summe Deus, Pa-
 ter, Fili & sancte Spiritus veneramur: O sacrosancta Trinitas, Tui fuit mune-
 ris, Tuæ benignitatis, excitare optimos Patronos, Fontium egregios Con-
 ditores, eorum opus promovere laudabiliter eiq; dicere bene cum ingenti
 emolumento, Tuum quoq; erit, digna pro meritis tribuere cunctis præ-
 mia, ut vivant salvi & florentes in pacè & tranquillitate, aucti egregiè om-
 nibusq; suis numeris & partibus beati. Tibi sit laus & honor, Tibi Gloria in
 infinitâ seculorû secula. Tuere porrò, O NUMEN PROPITIUM, singulos nos &
 universos ab omni malo & infortunio. Cingas undiquaq; & circumdes nos
 & Museum hoc cœlestium copiarû multitudine: Adsit præsto pios labores
 continuantibus sanctissimus Spiritus tuus. Emitte sapientiam Tuam è sede
 majestatis Tuæ, ut nobiscum sit & nobiscum laboret, ne sciamus quid
 sit acceptum coram Te omni tempore in sempiterna secula.

D I X I

FK

J. H. 19, 10.

(X204 4414)

Ye
639

I. N. J.

EUCHARISTICA ORATIO,

Juxta illud Numer. XXI. v. 18.

Disz ist der Bruñ/ den die Fürsten geerd
ben haben/ die Edlen im B
ben/durch den Lehrer u

In memoriam d
Munificentia & Libera

Serenissimi Principi

DN. JOH.
GEORG

Elect. Saxon. Burggrav

Domini nostri Cle

Allorum

Cum

REVERENDISSIMORUM & I

PRINCIP

Tum

Præ-Nobilium & Honorati

Vestigia Magni nostri Octov

Circa Restaurationem S

Et Auditorii Novi, jam jam

candis Lecti

d. XXV. Sep

Quo ante CXX

Novum Religioni Orthodoxæ ro

firmiter stab

publicè ha

M. Jacobo Reichm

TORG

Typis JOHANNIS ZA

Sereniss. Elect. Saxon. Typogr. Aut.



BIBLIOTHECA
PONICKAVIANA

